

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১১৫/২০১৭

ঢাকা, সোমবার ১২ জুন ২০১৭, ২৯ জ্যৈষ্ঠ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। কওমি শিক্ষার্থীদের মূলধারায় আনতে হবে : প্রধানমন্ত্রী
- ২। আফগানিস্তানে শান্তি প্রতিষ্ঠায় বাংলাদেশ পাশে থাকবে : প্রধানমন্ত্রী
- ৩। প্রধানমন্ত্রী আগামীকাল সুইডেন যাচ্ছেন
- ৪। উন্নয়নের ধারাবাহিকতা রাখতে জনগণ আওয়ামী লীগকে বিজয়ী করবে  
: কারামুক্তি দিবসের অনুষ্ঠানে প্রধানমন্ত্রী
- ৫। হাজারীবাগ থেকে ৩৫ ভাগ ট্যানারি সাভারে স্থানান্তর : সংসদে শিল্পমন্ত্রী
- ৬। সাংবাদিক কল্যাণ ট্রাস্টে ৫ কোটি টাকা দিয়েছে সরকার : সংসদে তথ্যমন্ত্রী
- ৭। বিশ্বমানের শিক্ষায় নতুন প্রজন্মকে গড়ে তুলতে হবে : শিক্ষামন্ত্রী
- ৮। আগামী অর্ধবছরে ৩৩ হাজার কিলোমিটার বিদ্যুৎ সংযোগ : বিদ্যুৎ প্রতিমন্ত্রী
- ৯। জাতীয় ঈদগাহে ঈদুল ফিতরের প্রধান জামাত সকাল সাড়ে ৮টায়
- ১০। আগামী ১ জুলাই থেকে পণ্য খালাসে ভ্যাট নিবন্ধন বাধ্যতামূলক
- ১১। বিশ্ব শিশুশ্রম প্রতিরোধ দিবস আজ

১। কওমি শিক্ষার্থীদের মূল ধারায় আনতে হবে : প্রধানমন্ত্রী

প্রধানমন্ত্রী শেখ হাসিনা দেশের কওমি মাদ্রাসা শিক্ষার উন্নয়নের জন্য প্রয়োজনীয় সহযোগিতা প্রদানে আলেম-ওলামাদের আশ্বাস দিয়েছেন। তিনি বলেন, আমাদের লক্ষ্য সকলের জন্য শিক্ষা নিশ্চিত করা এবং এই লক্ষ্য অর্জন করতে হলে সমাজের কোনো অংশকে পেছনে ফেলে রাখার সুযোগ নেই। গতকাল ১১ জুন প্রধানমন্ত্রী জাতীয় সংসদ ভবন কার্যালয়ে মাওলানা আশরাফ আলীর নেতৃত্বে কওমি মাদ্রাসার কয়েকজন শীর্ষস্থানীয় আলেম তাঁর সঙ্গে সাক্ষাৎ করতে গেলে তিনি এ আশ্বাস দেন। প্রধানমন্ত্রী শেখ হাসিনা বলেন, বিপুলসংখ্যক শিক্ষার্থী কওমি মাদ্রাসায় পড়াশোনা করে এবং তাদেরকে শিক্ষার মূলধারায় নিয়ে আসতে হবে। সূত্র-সংবাদ (শেষ পৃ.,ক.১), ইনকিলাব (পৃ.১,ক.৬), ইন্ডিপেনডেন্ট (পৃ.২,ক.১), নিউজ টুডে (শেষ পৃ.,ক.৫)।

২। আফগানিস্তানে শান্তি প্রতিষ্ঠায় বাংলাদেশ পাশে থাকবে : প্রধানমন্ত্রী

প্রধানমন্ত্রী শেখ হাসিনা যুদ্ধবিধ্বস্ত আফগানিস্তানে শান্তি প্রতিষ্ঠায় বাংলাদেশের প্রতিশ্রুতি পুনর্ব্যক্ত করেছেন। গতকাল জাতীয় সংসদ ভবনে প্রধানমন্ত্রীর কার্যালয়ে আফগানিস্তানের রাষ্ট্রদূত আবদুল রহিম ওরাজ বিদায়ী সাক্ষাৎ করতে গেলে প্রধানমন্ত্রী বলেন, আফগানিস্তানের সঙ্গে আমাদের এক ঐতিহাসিক ও চমৎকার সম্পর্ক রয়েছে। আমরা আমাদের সমর্থন অব্যাহত রাখব এবং আফগানিস্তানে শান্তি প্রতিষ্ঠায় আমরা পাশে থাকব। সূত্র-সংবাদ (পৃ.২,ক.৭)।

৩। প্রধানমন্ত্রী আগামীকাল সুইডেন যাচ্ছেন

প্রধানমন্ত্রী শেখ হাসিনা সুইডেনের প্রধানমন্ত্রী স্টেফান লোফভেনের আমন্ত্রণে তিন দিনের দ্বিপক্ষীয় সফরে আগামীকাল ১৩ জুন মঙ্গলবার সুইডেনের উদ্দেশ্যে ঢাকা ত্যাগ করবেন। সুইডেনে বাংলাদেশের কোনো সরকার অথবা রাষ্ট্র প্রধানের এটিই হবে প্রথম দ্বিপাক্ষিক সফর। গতকাল ১১ জুন রোববার পররাষ্ট্রমন্ত্রী এএইচ মাহমুদ আলী এক সংবাদ সম্মেলনে বলেন, সফরকালে দুই নেতার শীর্ষ বৈঠক শেষে বাংলাদেশ-সুইডেন দ্বিপক্ষীয় সম্পর্কের ভবিষ্যৎ কর্মপরিকল্পনা নির্ধারণ করে একটি যৌথ ইশতেহার সাক্ষর হতে পারে। পররাষ্ট্রমন্ত্রী বলেন, এই সফর দ্বিপক্ষীয় বাণিজ্য সম্প্রসারণ, বাংলাদেশ ও সুইডেনের মধ্যে টেকসই উন্নয়ন লক্ষ্যসমূহ (এজেডা ২০৩০) অর্জন এবং দুই দেশের মধ্যে অভিবাসন, জলবায়ু পরিবর্তন ও বৈশ্বিক সম্ভাব্য মোকাবেলার মতো ক্ষেত্রে সহযোগিতা জোরদার করবে। তিনি বলেন, প্রধানমন্ত্রীর এই সফরে ইউরোপ ও বৈশ্বিক পরিমণ্ডলে বাংলাদেশের ভাবমূর্তি আরো উজ্জ্বল হবে। সূত্র-ইত্তেফাক (পৃ.২,ক.৫), সমকাল (পৃ.২,ক.৫), অবজারভার (পৃ.১,ক.১), ইন্ডিপেনডেন্ট (শেষ পৃ.,ক.১)।

৪। উন্নয়নের ধারাবাহিকতা রাখতে জনগণ আওয়ামী লীগকে বিজয়ী করবে

: কারামুক্তি দিবসের অনুষ্ঠানে প্রধানমন্ত্রী

আগামী নির্বাচনে মানুষ আবারও নৌকায় ভোট দিয়ে আওয়ামী লীগকে নির্বাচিত করবে বলে আশা প্রকাশ করেছেন প্রধানমন্ত্রী শেখ হাসিনা। তিনি বলেন, আওয়ামী লীগকে ভোট দিয়ে আজ যে উন্নয়নের সুফল পাচ্ছে, তা দেশের প্রত্যেকটা মানুষ উপলব্ধি করে। সরকারের ধারাবাহিকতা একান্তভাবে প্রয়োজন, তাও আজ প্রমাণিত। প্রধানমন্ত্রী বলেন, উন্নয়নের ধারাবাহিকতা বজায় রাখতে মানুষ নিশ্চয় নৌকায় ভোট দিয়ে আওয়ামী লীগকে বিজয়ী করবে। শেখ হাসিনার নবম কারামুক্তি দিবস উপলক্ষে আওয়ামী লীগ নেতাকর্মীরা গতকাল ১১ জুন রোববার প্রধানমন্ত্রীর সরকারি বাসভবন গণভবনে শুভেচ্ছা জানাতে গেলে তিনি এসব কথা বলেন। অনুষ্ঠানে দলটির কেন্দ্রীয় নেতারা প্রধানমন্ত্রীকে ফুল দিয়ে শুভেচ্ছা জানান। সূত্র-সমকাল (পৃ.২,ক.৬), প্রথম আলো (পৃ.২,ক.৬), অবজারভার (শেষ পৃ.,ক.১), ডেইলি সান (শেষ পৃ.,ক.১)।

৫। হাজারীবাগ থেকে ৩৫ ভাগ ট্যানারি সাভারে স্থানান্তর : সংসদে শিল্পমন্ত্রী

শিল্পমন্ত্রী আমির হোসেন আমু সংসদকে জানিয়েছেন, হাজারীবাগ থেকে ৩৫ শতাংশ কারখানা সাভারের চামড়া শিল্প নগরীতে স্থানান্তরিত হয়েছে। গতকাল ১১ জুন রোববার সংসদে টেবিলে উপস্থাপিত প্রশ্নোত্তরে জাতীয় পার্টির (জাপা) সংসদ সদস্য নুরুল ইসলাম মিলনের এক প্রশ্নের জবাবে তিনি একথা জানান। শিল্পমন্ত্রী জানান, সাভারে বরাদ্দপ্রাপ্ত ১৫৪টি ট্যানারির মধ্যে ৫৫টি ওয়েট ব্লু চামড়া উৎপাদন শুরু করেছে। বাকি ট্যানারিগুলো ভবন নির্মাণ ও যন্ত্রাংশ স্থাপন কার্যক্রম অব্যাহত রেখেছে। সূত্র-ইত্তেফাক (পৃ.৩,ক.১), প্রথম আলো (পৃ.১৩,ক.৫), বাংলাদেশ টুডে (পৃ.১,ক.৭), ডেইলি সান (পৃ.৩,ক.২)।

৬। সাংবাদিক কল্যাণ ট্রাস্টে ৫ কোটি টাকা দিয়েছে সরকার : সংসদে তথ্যমন্ত্রী

সাংবাদিকদের কল্যাণে গঠিত সাংবাদিক কল্যাণ ট্রাস্টের নিজস্ব তহবিলে সরকার কর্তৃক ৫ কোটি টাকার সীডমানি দেওয়া হয়েছে বলে জানিয়েছেন তথ্যমন্ত্রী হাসানুল হক ইনু। গতকাল রোববার জাতীয় সংসদে তিনি এ তথ্য জানান। মন্ত্রী বলেন, সরকার সাংবাদিকদের বৃহত্তর কল্যাণে বাংলাদেশ সাংবাদিক কল্যাণ ট্রাস্ট আইন, ২০১৪ প্রণয়ন করেছে। এই ট্রাস্টের আওতায় ইতোমধ্যে একটি ট্রাস্টি বোর্ড গঠন করা হয়েছে। অপর এক প্রশ্নের জবাবে তথ্যমন্ত্রী সংসদকে জানান, দৈনিক, সাপ্তাহিক, পাক্ষিক, মাসিক, ত্রৈমাসিক, ষান্মাষিক মিলে দুই হাজার আটশ' পত্রিকা প্রকাশিত হচ্ছে। বর্তমান সরকার সাত বছরে সাত শতাধিক পত্রিকার নিবন্ধন দিয়েছে। এছাড়া বেসরকারি মালিকানায় ৩১টি টেলিভিশন, ২৪টি এফএম রেডিও ও ৩২টি কমিউনিটি রেডিও অনুমোদন দেওয়া হয়েছে। সূত্র-ইনকিলাব (শেষ পৃ.,ক.২), ইত্তেফাক (পৃ.৩,ক.৩)।

৭। বিশ্বমানের শিক্ষায় নতুন প্রজন্মকে গড়ে তুলতে হবে : শিক্ষামন্ত্রী

শিক্ষামন্ত্রী নুরুল ইসলাম নাহিদ বলেছেন, সরকার শিক্ষার সার্বিক উন্নয়নে নিরলসভাবে কাজ করে যাচ্ছে। একটি যুগোপযোগী শিক্ষানীতি প্রণয়ন ও বাস্তবায়ন করা হচ্ছে। তিনি বলেন, শুধু জ্ঞান অর্জন করলেই হবে না, আধুনিক ও বিশ্বমানের শিক্ষায় নতুন প্রজন্মকে গড়ে তুলতে হবে। গতকাল ১১ জুন রোববার মৌলভীবাজারের কমলগঞ্জ উপজেলার মাধবপুর ইউনিয়নের উত্তর মাঝেরগাঁও গ্রামে বিচারপতি সুরেন্দ্র কুমার সিনহা স্কুল অ্যান্ড কলেজের উদ্বোধন অনুষ্ঠানে প্রধান অতিথির বক্তব্যে তিনি এসব কথা বলেন। সূত্র-সমকাল (পৃ.১৯,ক.৫)।

৮। আগামী অর্ধবছরে ৩৩ হাজার কিলোমিটার বিদ্যুৎ সংযোগ : বিদ্যুৎ প্রতিমন্ত্রী

বিদ্যুৎ, জ্বালানি ও খনিজসম্পদ প্রতিমন্ত্রী নসরুল হামিদ জানিয়েছেন, ২০১৭-১৮ অর্ধবছরে দেশের ৬৪ জেলার ৭৮টি এলাকায় ৩৩ হাজার ৮৩৯ কিলোমিটার নতুন বিদ্যুৎ সংযোগ দেওয়া হবে। সংসদে মামুনুর রশীদ কিরণের এক প্রশ্নের জবাবে তিনি একথা বলেন। সূত্র-যুগান্তর (পৃ.২,ক.৭), ইত্তেফাক (পৃ.৩,ক.১), ডেইলি সান (শেষ পৃ.,ক.২), নিউ নেশন (শেষ পৃ.,ক.৬)।

৯। জাতীয় ঈদগাহে ঈদুল ফিতরের প্রধান জামাত সকাল সাড়ে ৮টায়

জাতীয় ঈদগাহ ময়দানে ঈদুল ফিতরের প্রধান জামাত অনুষ্ঠিত হবে সকাল সাড়ে ৮টায়। তবে আবহাওয়া প্রতিকূল থাকলে ঈদের প্রধান জামাত সকাল ৯টায় বায়তুল মোকাররম জাতীয় মসজিদে অনুষ্ঠিত হবে। গতকাল ধর্ম মন্ত্রণালয়ে এক সংবাদ সম্মেলনে এ তথ্য জানান ধর্মমন্ত্রী মতিউর রহমান। সূত্র-সংবাদ (পৃ.১,ক.১), সমকাল (পৃ.৪,ক.৮), বাংলাদেশ টুডে (পৃ.৩,ক.৪)।

১০। আগামী ১ জুলাই থেকে পণ্য খালাসে ভ্যাট নিবন্ধন বাধ্যতামূলক

অনলাইন ভ্যাট নিবন্ধন ছাড়া পণ্য খালাস করতে পারবেন না কোনো আমদানিকারক। এ বিষয়ে জাতীয় রাজস্ব বোর্ড একটি প্রজ্ঞাপন জারি করেছে। আগামী ১ জুলাই থেকে এ নিয়ম কার্যকর হবে। প্রজ্ঞাপনে বলা হয়, দেশে আমদানি-রপ্তানি ব্যবসা চালাতে হলে অনলাইনে নিবন্ধন করে ডিজিটাল ভ্যাট নম্বর নিতে হবে। সূত্র-সংবাদ (শেষ পৃ.,ক.২), জনকণ্ঠ (পৃ.১৮,ক.৬)।

১১। বিশ্ব শিশুশ্রম প্রতিরোধ দিবস আজ

সারাবিশ্বে ১২ জুন এ দিবস পালিত হয়। এ বছর দিবসের প্রতিপাদ্য 'যুদ্ধক্ষেত্র ও প্রাকৃতিক দুর্যোগের সময় শিশুদের শিশুশ্রম থেকে রক্ষা করো'। দিবসটি উপলক্ষে রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা পৃথক বাণী দিয়েছেন। রাষ্ট্রপতি তাঁর বাণীতে বলেন, রপ্তানি বাণিজ্যে শিশুশ্রম একটি গুরুত্বপূর্ণ ইস্যু। তাই দেশের রপ্তানি প্রবৃদ্ধি অব্যাহত রাখতে হলে উৎপাদন থেকে শুরু করে বিপণন পর্যন্ত প্রতিটি স্তরে কঠোরভাবে শিশুশ্রম মুক্ত পরিবেশ নিশ্চিত করতে হবে। প্রধানমন্ত্রী তাঁর বাণীতে বলেন, সরকার এসডিজি অর্জনে শিশুশ্রম নিরসনকে অন্যতম সূচক

হিসেবে নির্ধারণ করেছে। যে কোনো সংঘাত, সংকট দুর্যোগে শিশুদের নিরাপদ রাখতে সরকার বদ্ধপরিকর। প্রধানমন্ত্রী বলেন, বর্তমান সরকার জাতিসংঘ শিশু অধিকার সনদ ও ঝুঁকিপূর্ণ শিশু শ্রমবিষয়ক আইএলও কনভেনশন অনুসমর্থন করেছে। শিশুশ্রম নিরসনের লক্ষ্যে জাতীয় শিশুশ্রম নিরসন নীতি-২০১০ প্রণয়ন করা হয়েছে। সূত্র-সমকাল (পৃ.৩,ক.৪), জনকণ্ঠ (শেষ পৃ.,ক.৪), ইন্ডিপেনডেন্ট (পৃ.১৯,ক.৫), ফিনানশিয়াল এক্সপ্রেস (পৃ.৩,ক.২), নিউজ টুডে (পৃ.৩,ক.১)।

### সম্পাদকীয়

- ক. **ইন্ডোফাক** : সরকারি চাকরিতে জেলা কোটা পদ্ধতি পুনর্নির্ধারণ করার বিষয় তুলে ধরে মেধা ও যোগ্যতাই যে কোনো নিয়োগের প্রধান মাপকাঠি হওয়া প্রয়োজন বলে মতপ্রকাশ।
- খ. **সংবাদ** : বাস-ট্রেন-লঞ্চের অগ্রিম টিকিট নিয়ে যারা কালোবাজারি, অনিয়ম এবং দুর্নীতি করবে তাদের গ্রেফতার করে দৃষ্টান্তমূলক শাস্তির ব্যবস্থা করার আহ্বান।
- গ. **জনকণ্ঠ** : চট্টগ্রামের মীরসরাইতে প্রস্তাবিত সোলার পাওয়ার হাব নবায়নযোগ্য বিদ্যুৎ উৎপাদনের ক্ষেত্রে পথ প্রদর্শক হতে পারে বলে অভিমত।
- ঘ. **প্রথম আলো** : স্ট্রোক, ক্যানসার, ডায়াবেটিস, হৃদরোগ, নিউমোনিয়া, হাঁপানি, উচ্চ রক্তচাপসহ নানা অসংক্রামক রোগ প্রতিরোধযোগ্য হওয়ায় এসব রোগ প্রতিরোধ ও প্রতিহত করতে পারিবারিক পর্যায়ে সচেতনতা বৃদ্ধির ওপর গুরুত্বারোপ।
- ঙ. **সমকাল** : শিশু হত্যা ও নির্যাতন রোধে শিশু হত্যা নির্যাতনের মামলাগুলো দ্রুত বিচারের ব্যবস্থা করার আহ্বান।
- চ. **যুগান্তর** : ট্রুথ কমিশনে মার্জনা পাওয়া আত্মস্বীকৃত দুর্নীতিবাজদের কোনো ছাড় না দিয়ে শাস্তির আওতায় আনার সুপারিশ।
- ছ. **ভোরের কাগজ** : রোজায় গ্যাস-পানির সরবরাহ যথাসম্ভব নির্বিঘ্ন রাখতে সংশ্লিষ্টদের বিশেষভাবে তৎপর থাকার আহ্বান।
- জ. **ইন্ডিপেনডেন্ট** : পাবলিক পরীক্ষার প্রশ্নপত্র ফাঁসের ঘটনা প্রতিহতে পাবলিক এক্সামিনেশন অ্যাক্ট-১৯৮৩ এর দুর্বলতাগুলো সংশোধন করতে আইন ও শিক্ষা মন্ত্রণালয়কে সমন্বিতভাবে কাজ করার সুপারিশ।
- ঝ. **ডেইলি সান** : ঈদের কেনাকাটাকে কেন্দ্র করে নগদ অর্থ বহনের সাথে সাথে ছিনতাইয়ের ঘটনা বেড়ে যাওয়ায় উদ্বেগ প্রকাশ করে আইনশৃঙ্খলা বাহিনীকে নিরাপত্তামূলক ব্যবস্থা জোরদার করার আহ্বান।
- ঞ. **নিউ এজ** : মে মাসে বিদ্যুতের ওভারলোডের কারণে বিদ্যুৎ বিতরণের ট্রান্সফরমার বিকলের ঘটনা বেড়ে গিয়ে গ্রামের জনগণের দুর্ভোগ বেড়ে যাওয়ায় বিদ্যুতের ট্রান্সফরমারগুলো নিয়মিত মনিটরিং করে মেরামত করার সুপারিশ করে সম্পাদকীয় প্রকাশ করেছে।

### উপ-সম্পাদকীয়

**ইনকিলাব** পত্রিকায় প্রকাশিত কলামে উল্লেখ করা হয়েছে, বনাঞ্চল সম্প্রসারণের ব্যাপারে সরকারি উদ্যোগ একাই যথেষ্ট নয়, এ ব্যাপারে প্রত্যেক সচেতন নাগরিককে এগিয়ে আসতে হবে।

### নিবন্ধ ও ফিচার

**ইন্ডোফাক** পত্রিকায় প্রকাশিত ‘চাই খেলোয়াড়দের ভবিষ্যৎ জীবনের নিশ্চয়তা’ শিরোনামের নিবন্ধে অভিমত প্রকাশ করা হয়েছে, মাদক, সন্ত্রাস, জঙ্গিবাদ ও অপসংস্কৃতির হাত থেকে নতুন প্রজন্মকে রক্ষা করতে আমাদের সন্তানদেরকে লেখাপড়ার পাশাপাশি খেলাধুলা ও সুস্থ ধারার সংস্কৃতিচর্চায় উদ্বুদ্ধ করতে হবে।

#

শুকলা/মরজিনা/সাদ্দা/রশীদ/তানিয়া/২০১৭/৯.০০ ঘণ্টা